

Kanser (i metástasis)



FUNDASHON **M**ARIADAL



Kanser (i metástasis)

E término 'kanser' ta indiká un grupo di malesa kaminda sèlnan apnormal ta dividí i plama nan mes di un forma kaótiko. Mayoría bia e sèlnan apnormal ta forma un masa, tambe yamá tumor. Tin mas ku 100 diferente tipo di kanser. Kada tipo di kanser ta un malesa diferente ku un propio tratamentu.

Unda kanser ta situá

Bo por haña kanser tur kaminda den bo kurpa. E por ta sintá den e wesunan òf den e sanger, e kueru, e sesu òf e tripanan i na diferente otro lugá. Nos ta yama e tipo di kanser na e lugá kaminda e divishon di sèlnan malu a kuminsá. Pues por ehèmpel si esei ta den e tripanan, e ora ei ta yamá: kanser di tripa. I si e ta den e kueru, e ora ei e ta: kanser di kueru. Pero tin biaha e sèlnan di kanser ta bandoná e lugá kaminda nan a kuminsá i e ora ei bai 'biba' na un otro lugá den e kurpa esei e ora ei yama metástasis.

Benigno i maligno

Ta eksistí tumornan benigno i maligno. Solamente ora ta trata di tumornan maligno nos ta papia di kanser.

- Tumornan benigno no ta sigui krese dor di otro tehido. I nan no ta plama nan mes dor di e kurpa. Un ehèmpel di un tumor benigno ta un karni na matris (myoma uteri) òf un frèt. Un tumor asina por primi kontra e tehido òf órganonan rònt di dje. Esaki por ta un motibu pa kita e tumor.
- Serka tumornan maligno e sèlnan ta komportá nan mes hopi diferente. Esaki ta pasobra e gènnan ku ta tene e sèlnan bou di kòntrol ta dañá. Un tumor maligno por krese den e tehido i órganonan rònt di dje. I por plama mas leu.

Kiko ta metástasis

E ta nifiká ku un òf mas sèl di kanser ta kita for di e tumor i ta bai 'kana' dor di e kurpa. Un tumor ta surgi un otro kaminda e ora ei atrobe tambe, dor si esun sèl di kanser ei. E kanamentu ei di e sèlnan di kanser ta bai via kanalnan den e kurpa. Sèlnan di tumor pues por yega diferente otro lugá, via e kanalnan ei, por ehèmpel via e adernan. E kanser ta plama di e forma ei, manera ta bisa. I si esei ta asina, ta hopi mas difísil pa trata e kanser. Asina por ehèmpel ta hopi mas difísil pa hasi operashon si e ta na hopi diferente lugá den e kurpa. E chèns ku ta fayesé dor di kanser pues ta mas grandi ora tin metástasis.

Kehonan

Metástasis por kousa kehonan. Kehonan ta dependé di e lugá di e metástasis i e ekstenshon di dje. Metástasis den komienso mayoria biaha no ta duna niun òf poko keho. Ora e metástasis ta krese, nan ta primi hopi biaha riba e tehido rònt di nan òf ta krese drenta den dje. Esaki sí por kousa keho. Ehèmpelnan di keho:

- Metástasis den e wesunan por kousa doló òf kibramentu di wesu
- Metástasis ekstenso den e higrá por kousa un higrá ku ta bira mas grandi, walmentu di stoma, falta di gana di kome, un kuero hel i grawatashi.
- Metástasis den e pulmonnan por blòkia e trakto respiratorio, pa kual motibu por surgi ansha òf pulmonia.
- Dor di metástasis ku ta krese for di e apdómen drenta e blas, por tin sanger den e orina.
- Dor di metástasis den e barika a lo largu e pasashi di e tripanan por bira blòkiá.
- Kanser ku a plama ekstensivamente por kousa kansansio tambe.
- Mayoria biaha no por pronostiká si bo lo haña keho.

Tratamentu

Si por trata metástasis ta dependé di:

- E tipo di kanser original
- E ekstenshon i e lugá di e metástasis
- Bo kondishon

E spesialisista lo konsultá ku bo si un tratamentu tin sentido i ta deseabel. Den mayoria di situashonnan e tratamentu di metástasis ta dirigí riba e disminushon di e malesa i/òf e redukshon di e kehonan. Pa hopi hende den e situashon ei ta konta ku nan ta haña e kalidat di nan bida lo mas importante. Pues laga informá bo bon tokante e bentahanan i desbentahanan di un tratamentu. Bo por puntra por ehèmpel tokante e resultado ku por ferwagt, e efektonan sekundario i e posibel konsekuensianan di e tratamentu. I kiko ta sosodé si bo no hasi nada? Ta importante tambe pa sa kiko bo mes mester hasi pa e tratamentu. Por ehèmpel si bo mester bai hòspital frekuentemente. Despues bo por hasi e mihó eskoho pa bo mes.



Pregunta

Bo tin pregunta ainda tokante e foyeto Kanser (i metástasis) e ora ei bo por tuma kontakto riba dia di trabou, na ora di trabou ku e enfermero di onkologia na number di telefòn: 7800493. Pa mas informashon amplio tokante kanser i metástasis mira www.kwf.nl



FUNDASHON **M**ARIADAL